

Ilay Voa Tsara Nafafy

Bartimeo jamba ... niantso ... nanao hoe: Ry Jesosy, Zanak'i Davida ô, mamindrà fo amiko! ... Ary Jesosy nijanona, dia nanao hoe: Antsoy ilay jamba. Ary ny olona niantso azy ka nanao taminy hoe: Matokia, mitsangàna, miantso anao Izy. Dia nanary ny lambany izy ka niantsambotra nankeo amin'i Jesosy.

Marka 10. 46-50

Tsy manam-potoana aho

Impiry impiry moa isika no manonona io fehezanteny io? Tsy manam-potoana hanampiana ny namako na ny mpifanolo-bodirindrina amiko, tsy manam-potoana hieritreretana, hikarakarana ny fanahiko, hifaneraserana amin'Andriamanitra, hamakiana ny Baiboly na handehanana any am-piangonana... Tsy manam-potoana hoe?

Inona no manetsika ahy sy mitondra ny fiainako? Ny toetoetrako ara-batana ve? mihinana, mitafy, manao fanatanjahantena... Sa ny saiko mirehidrehitra na tototra zavatra maro aoka izany? horonan-tsarimihetsika, mozika, fianarana, fandehandehanana...

Nefa iza moa no mandahatra izao tontolo izao sy ny fanaovany zavatra tafahoatra, mba hisakanany ahy tsy hanao fandinihana mahaso sy milamina? Ny devoly, ilay fahavalon'ny fanahiko. Ny tanjony dia ny hanary dia antsika, mandra-pahatonga ny andro izay — na tiana na tsy tiana— ho tara loatra hahafahana mikarakara ny fanahy... satria tsy maintsy hihaona amin'Andriamanitra isika. Jesosy, Ilay Zanak'Andriamanitra anefa dia niseho mba handrava ny asan'ny devoly (1 Jaona 3. 8), sy hanafaka antsika amin'ny fahefany. „Raha ny Zanaka no hahafaka anareo, dia ho afaka tokoa ianareo” (Jaona 8. 36).

Nandritra ny fiainany tetỳ an-tany, Jesosy dia naka fotoana mba hikarakarana ireo rehetra nangata-bonjy aminy. Teny an-dalana dia niantsoantso tamin'ny heriny manontolo i Bartimeo jamba, hoe: „Jesosy ô, mamindrà fo amiko!” Notadiavina hampanginina izy. Nefa nijanona Jesosy! Tsy tery loatra ny fotoanany, tsy maika Izy, na tototra asa... Teo anivon'ny asany midadasika, ireo zava-mavesatra nilàna fanampiana, ny vahoaka nifanety taminy, dia vonona mandrakariva Izy hikarakara ny olona tsirairay: ho an'i Bartimeo mpangataka izay nositrany, ho anao amin'izao fotoana izao!

Izy dia manam-potoana ho anao: te hamonjy anao, ary te hanome anao ny fiainana mandrakizay. Nefa ve ianao manam-potoana hihainoana Azy?

